

四庫全書

集部

欽定四庫全書

集部

浮溪集卷八至十

詳校官庶吉士臣翁樹培

侍讀臣孫球覆勘

總校官檢討臣何思鈞

校對官編修臣朱攸

謄錄監生臣于復慤

欽定四庫全書

浮溪集卷八

宋 汪藻 撰

外制

皇叔祖鄭州觀察使同知宗正司事仲昀可承宣
使制

昔宣王中興名穆公以同姓糾合宗族于成周而賦常
棣之詩今朕受命纂承汝亦能輯吾支屬雖肺腑葭莩

之親莫不咸在朕甚嘉之書不云乎親睦九族九族既睦
平章百姓雖堯之聖不敢後宗族而治天下也則汝之
勞烏可以不錄哉留務之秩實亞節旄肆以命汝尚思
吾所以寵進之意可不懋哉

中書舍人范宗尹御史中丞制

國家建御史以糾百官之正邪以維持政事之得失與
漢唐略等而常虛大夫之官不除用中執法為之長然
其人之賢否繫國之重輕觀一時朝廷舉措如何而中

執法之才見矣具官某操修端亮學問淵深高論凜然
力扶公道直聲藉甚屢擊權臣久違表著之班良竭箴
規之益是用還之憲府付以朝綱昔真卿當再造之初
不廢抨彈于多事僧孺踵稍寬之後每先簡練于有才
惟爾之賢必知所處

諫議大夫衛膚敏中書舍人制

朕惟古者諱言之朝諫臣有不得其職者况非言責之
任乎如其不然雖畎畝芻蕘皆蒙危言之策矧居侍從

獻納豈殊以爾具官某直諒多聞端方有守出將使節
屢為疆場之華入對便朝每罄箴規之益比雖升于厥
秩實未究于所長是用嘉爾能言試之掌制輟自七人
之列擢居四禁之聯雖潤色除書所賴詞章之富然論
思政本必資風節之彊勿以茲遷而忘予弼

中書舍人劉觀給事中制

東西二省自祖宗以來為維持政本之地其要等耳然
瑣闥邃于掖垣書牘優于詞命掄才既遴疏寵亦殊以

爾具官某秉直諒之心懋精深之學貫穿今古飾以詞章之華辨明是非凜然風節之勁比司詔命蔚有能稱宜升文石之班遂正黃扉之秩惟忠臣事上知無不言惟君子居官要為可紀勿令批敕之譽減于代言之時

趙鼎除司諫呂祉除正言制

古者君臣之職在于聽言納言之間言而不從君任其咎矣居言責之地而不盡言于其君者獨無愧于其官乎以爾學問操修士夫所仰茲予置爾于七人之列爾

其夙夜罄竭以報所蒙母謂其君不能而蹈古人之戒也

左司諫趙鼎殿中侍御史制

法吏以糾官邪諫官以箴主失二塗雖異委任則均以爾亮直端方其言有物伏蒲未久厥譽四聞姑借爾才重吾憲府爾其勿憚大吏知無不言勿謂當從容議論之餘而不樂抨彈之事也

給事中劉珏吏部侍郎制

唐以銓衡付吏部居其官者得進退天下之才而人重
于法今啟擬歸朝廷典選者謂之有司按籍第員書名
惟謹而法重于人自艱難以來真偽渾淆銓綜之權其
輕尤甚非用心于法度之外者安能振頽綱于既壞之
後哉具官某性識疏通天資雅亮守其當守必求至理
之歸言所難言良得近臣之體比居瑣闥之任屢閱囊
封之陳孰副予求莫如汝器往佐爾官之長深求厥弊
之源嗚呼惟仁能恤滯淹惟明能察僥冒惟勤能濟事

劇惟正能檢吏欺茲爾優為勉之而已

李楫監察御史制

朕稽考百官之治賴一時耳目之官求諸時髦未見剛者以爾殫精古學博極羣書不以軒裳為心老于州縣之役茲近臣之論薦適有契于予衷擢自遐方俾參臺屬夫為國督姦者法吏之職至誠嫉惡者古人之心朕既以激濁揚清待卿汝無以交淺言深為戒

方閭國子司業制

朕惟國家之治亂未有不由庠序之廢興者也故古之
賢君有投戈講藝息馬論道者豈嘗一日忘學哉以爾
某秉心靖專操行純一必能使吾甬子絃誦不衰嗚呼
賢士之關風化之所從出也其銷患于冥冥之中多矣
朕之所以望汝者故豈淺哉

商守拙大理卿制

法者一成而不變情者日出而無窮以不變之法馭無
窮之情而決死生于此非其人可乎以爾某詳練有聞

端方不撓古所謂明察之官忠信之長者爾庶幾焉往踐九卿之聯司吾三尺之憲昔人以身蹈死救人之死者方為稱職汝當其責可不勉歟

王彥成太僕少卿制

朕臨御以來躬節儉為天下先未嘗有輿馬之好也然郊廟之奉攻守之須所以為軍國之容有不得而廢者以爾某清修有立廉靖無求出入朝廷踐揚蓋久必能修明厥職體朕至懷然古者僕臣正厥后克正則朕之

所以望爾者亦豈與馬之間哉

祝廷衛尉少卿制

九卿朝廷高選也異時率以諸郎久次者為之未有徑
躋而躡至者也以爾太學譽髦之舊累朝循吏之餘獨
抱遺編不忘所學屢持使節幾老于行是用升之特揖
之聯遂爾本朝之志職閒無事惟以均勞

王撥除直秘閣制

朕惟敵人寇邊小雅盡廢枕戈嘗膽雖寢食間意未嘗

卷八
不在大河之北也爾効官忠勇假守一州能得士心殺敵過當萬功來上朕甚壯之延閣之華搢紳所貴肆以命汝尚勉之哉朕之期卿不止于此

貴州刺史知順安軍徐沆轉團練使制

昔李牧為趙守邊匈奴不敢犯塞吾藝祖用郭進守山西疆場無事幾二十年肆國家艱難以來敵騎長驅城門無結草之衛朕思古人之賢而恨今日梟俊擒敵之臣未之見也以爾等智足經遠忠能解紛于王靈不及

之時厲士卒沮傷之氣力固吾圉不為敵吞朝廷爵祿
乃與汝等共之者也顧惜一官為汝之勸哉然銳于始
怠于終古人之至戒其益明籌策副吾所以仰成之意
雋功來上嗣有寵褒

隨龍康益特轉團練使監御輦院制

方國家多事凡禁列之高者無不將屯乘塞為士卒先
爾乃以需恩升州團之班而掌吾輿輦之事靡有憂責
從容殿廬非以勞且舊乎往踐厥官求所以稱此者毋

謂恩可常得而不知幸也

范冲荆湖北路轉運副使制

嗚呼自艱難以來民勞甚矣欲惠吾元元無侵冤之苦者非部使者孰任其責哉以爾論議英明世其家學踐揚中外所至可觀惟湖湘控帶東南地數千里盜新喋血耕稼失時汝其謹視官邪應條輒舉使一方之俗皆蒙朝廷之恩副朕臨遣之意則汝之譽處豈不休哉

王敏文潼川府路轉運副使制

嗚呼自艱難以來民勞甚矣惟兩川獨為全實譬善醫者護其良膚則其他瘡痍所生不勞而復其于命使可不選掄以爾操行庶平所臨輒治是用付爾以潼江之節爾其調節邦用如血脈然使一方阜安則中原蒙福能任茲責時乃之休

褚宗諤廣南東路轉運副使制

朕惟嶺海萬里之遠雖飛輓芻粟不至中州而象犀珠貝之珍實佐經費以爾吏能高妙所至有聲深達利源

精于心計其上江壩之節往臨蠻蜚之區報政來歸參
華奚遠

曾謂陝西轉運副使制

關陝雖被邊臨塞然天下用兵未嘗不為朝廷重也矧
今多事尤在得人以爾風力強明見于屢試朕方西顧
藉爾一行爾其峙糗糧通鹽筴勿病吾俗勿飢吾師縈
策蟻封之間揮斤盤錯之地往辦吾事益觀爾能

孔彥舟轉武翼大夫添差東平府鈐轄制

朕惟國家多事之時智者獻其能勇者服其勞茲人材
畢見桑陰未徙而功成也頃者帥幕初開羣臣陪扈間
關跋履遂濟中興小大悉裒汝其一也擢居使秩出總
州兵茲謂異恩無忘報稱

武功大夫成州刺史黃珙已復舊官差知邕州制
朕于天下一視同仁雖遐荒萬里之遠擇二千石之良
與吾東西州無以異也爾明于軍政有將帥材游更使
令中坐小法肆予拔拭用汝典州汝其慎守封陲信于

蠻蜚有民有社所任非輕足食足兵以安為上勉圖來效嗣有寵褒

京東路轉運判官柴天因升轉運副使兼知青州

制

海岱之間稱古形勝人比習亂莽為盜區思得詳練剛明之材兼膺折衝饋餉之任以爾知吏方略為時老成久分外計之權頗熟東州之事其升使選勉為朕行昔管仲佐齊侯內修軍政龔遂至渤海首散郡兵伊治術

之何常惟賢明之所擇審思籌策毋失事機

凌唐佐直秘閣京畿提刑再任制

朕省方南服空京師不都然宗廟宮室在焉既命重臣以守又擇部使者歲時按行其封以爾詳練有聞不辭繁劇平反畿內民以不冤其升延閣之班重付祥刑之寄尚巡凋瘵毋廢哀矜

甘暉可宣贊舍人制

朕以宸闈二閤處天下戎班之俊而掌賓贊之事者其

選尤高以爾器識疏通屢更繁使項從牧圉事朕艱難
既緣大賚之均仍有舊恩之異積茲寵數陟以華資汝
其體朕眷知勉思忠恪始終保此惟乃之休

蔡溥太府寺丞制

周官太府下大夫二人而上士七十二人為之屬今丞
其遺法也以爾知識敏明踐揚滋久蓋能知出納之吝
者往助而長以濟劇繁

郭敏修都水監丞制

古者有水官水學以是學而居是官其失鮮矣以爾習于河事用志不分往督隄繇寬吾憂顧勿徒繁擾而或負丞

傅宿韓澄吏部郎官制

天官所以總天下之材而自省方以來官簿不輯吏緣為姦苟得其人賢于法具以爾宿儒學之秀以爾澄世家之良茲用付以銓曹之繁處之省戶之要往佐而長益觀汝能

張公濟倉部郎官謝亮主客郎官制

朕設諸郎以振舉治功以待異時非常之選凡加掄擢
必考僉言以爾公濟有剴繁之材茲予命爾以司儲之
職以爾亮有專對之敏茲予命爾以掌客之官各既乃
心欽承予意

李陵右司員外郎制

朕惟國家艱難以來百司綱紀日失其序詔令稽壅吏
媮不虔思得譽髦之英任吾宰屬之職以爾受材開敏

臨事激昂經術精深為諸生之冠議論堅正有前輩之風稽諸僉言汝稱茲選惟蟻封知良馬之藝惟肯綮見良庖之能勉究乃心贊成予治

胡寅駕部員外郎制

朕比裁中都官之員于員外郎選精矣其委任之間亦豈異時比哉爾問學有聞早膺推擇茲錫命書之寵復從省戶之游往服清塗益恢遠業

駕部員外郎尹東珣庫部員外郎制

朕于郎曹均取才望選除之寵易地皆然以爾開敏之
資有聲省戶茲緣換部姑正厥名往服朕恩靖共爾位
張宗臣大理寺丞孔仲原大理司直制

臯陶為大理漢法罪人必正于理豈不以獄者人之司
命固不可苟哉今爾等有職于其間蓋朝廷遴選也其
思欽慎以對寵依

李迨李承造御營使司參議官制

朕遭時多艱思屈羣力既與二三大臣制勝于帷幄之

中而又覽天下之英豪以收其略以爾性資明銳多所
踐更明今日之事機得古人之籌策茲升延閣參預秘
謀往圖不世之功以濟中興之舉

張自牧補從事郎御營使司準備差使制

朕出爵不待廉茂幾以致天下之豪傑况汝以經術行
誼為衆所推而達于朕聽者乎然名譽之下古難其人
可令施行毋甚高論

都官員外郎尹忠臣廣南東路轉運判官制

朕惟嶺海去京師萬里之遠民弱而陋吏貪而愚法令
詔條所存無幾非廉平強濟者孰能稱吾臨遣之意哉
以爾風力有聞吏功屢最宜從省戶之選往疾使軺之
驅爾其謹視官邪拊循蠻俗使斯民受賜如在朕戶庭
之間則汝為稱職

趙哲提舉兩浙路巡社兼提點刑獄公事制

古者鄉立塢壁防盜賊之侵已室家可保今吾廣其法
于天下又置使者推行之庶幾姦宄潛消里閭無事以

爾屢更煩使蔚有能稱茲用假爾繡衣之榮往臨吳會
汝其徧詣提封申明約束毋彊不欲毋縱敗羣使農安
于野行旅通于塗則為稱職

陳起宗直徽猷閣都大提舉川陝路茶馬制

朕惟馬政不修無甚今日軍容廢缺朕甚憂之以爾少
有俊才累更幕府必能為吾講摘山之利得充廐之良
協和種羌貿易無壅是用進凝嚴之直為臨遣之榮昔
衛文公承國遷之後元年車三十乘末乃十之豈區區

諸侯之國而今不及古哉在爾勉之而已

知興仁府鄧紹密右文殿修撰制

昔漢陳湯唐郭元振皆以不護細謹卒成功名故古之
論人材者曰使信如尾生廉如伯夷亦何益于成敗之
數哉爾起于投閒守此凋郡而能因時制變分朕顧憂
糾合民兵率先諸郡清資顯秩本以待功矧方艱虞于
汝何惜往服朕命益勤撫綏豈無茂恩觀汝來效

吳給徽猷閣待制知東平府制

朕惟齊魯之墟更此侵陵之變不復為郡逮今逾時每軫念于夙宵孰拯民于塗炭以爾具官某謀能威敵勇不顧身坐修塢壁之嚴悉保旄倪之衆勦除羣醜綏靖一方爰升次對之聯仍委藩宣之寄往圖長算勿廢前功

張自牧轉兩官直秘閣京東轉運判官制

朕惟東州經喋血之餘兵民雜屯農末皆病思得奇士通吾利源以爾膺特起之招有非常之略頃將使指信

著此方其升延閣之班仍峻文階之等往垂軺傳臨按
列城如飛輓之稍行則瘡痍之可復政成來報朕不汝
忘

進士周義起劉宜孫充大金通問使屬官特授從
事郎制

漢使絕域必求茂材異行之人唐聘諸蕃亦用經術通
明之士爾等早游庠序以學發身而能臨義慨然奮身
不顧雖為人之屬而任則匪輕何惜一官成汝之志使

誠通而好結則予之所以待汝者豈止此哉

傳崧卿黃叔敖中書門下檢正制

朕惟異時宰士止于中臺之屬不足以預聞命令之原
故又置檢正之官以通知三省之政非夫詳練老成通
知世務者不在茲選以爾性資明銳多所踐更茲予首
以命汝汝其摘過差以裨國論程期會以扼吏姦肆觀
爾能尚有殊擢

上官愔祕書省校書郎制

汝名臣子少有軼材方時急賢當在崇養今冊府士大夫之冀北也少休駿足以適夷塗

張孝純子頴直秘閣制

爾父身陷敵而爾母援比為爾求官夫延閣之華朕方澄此選今以假汝不謂無恩惟母頴家聲是為報國

李長民秘書省正字制

朕懲夫艱危之時見士大夫無可使者欲廣儲英俊時出而用之以爾種學績文聲華藉甚圖書之府本以養

材往游其間觀汝遠器

黎譯御史臺主簿制

御史府朝廷風憲之地以簿領鉤稽于其間者蓋不輕授往贊而長毋失官職

蘇良冶太常寺主簿制

簿領雖卑然隸于預聞禮樂之事非他官比也非爾通敏朕不汝除

蕭倫都水監主簿制

水失其行隄絲不息雖勾稽之官有不得而廢者今以命汝往服朕恩

趙善淑等各可補承信郎制

公族國之枝葉也葛藟猶能庇其本根而況于國乎此朕于艱難之時敦睦之恩尤不敢替也汝等幸同屬籍歲久寢蕃雖胄出祖宗信厚皆如麟趾然身夷編戶貧者或乘牛車各命一官使之從仕往安爾祿無負朕恩

宗子趙彥謨補承信郎制

爾宗室子學業中程更此湛恩宜登仕版益勤講習上
答所蒙

謝才等補承信郎制

頃者盜發潢池東南震擾汝從民伍斬敵有功何惜一
官旌其忠勇尚圖來效以稱朕恩

進武校尉常益等可承信郎制

爾頃因遣使奉荅以從既返國都宜酬其績進官一等
尚勉之哉

任決補承信郎制

春秋時士有死兵者其家必得仕于其國蓋責人以所甚難者其報當爾也今予以爾從弟某死于城守寢邱有加澤之所覃遂至官汝嗚呼汝知夫死者不可復生而國家之恩不可妄得也可不勉哉

樞密院編修官張灝改宣教郎制

計日而遷不可秋毫私者有司之法也今爾以編削之才游樞機之府而略其歲月者蓋朝廷之恩往服寵榮

以須甄擢

知壽州康允之進直龍圖閣制

自軍興以來師帥之官間敵而委城者相望也爾以孑然孤壘屹立于羣盜沸拏之中得其人心皆以死奮坐令反寇奔潰不支河圖之華未足旌汝方稽閱閔嗣有寵褒

張昱轉兩官閣門祇候知慈州制

得城則以侯其將得賂則以分其士茲古英主所以收

天下豪俊之用也肆朕臨御適遭多艱恨無奇功當此
醲賞今乃得汝尚庶幾焉進官而兼上閣之華因仕而
付專城之寄併茲異數待汝可知尚既乃心無忘予報

秉義郎甘暉可閣門祇候制

上閣之秩武臣之高選也朕常遴擇不妄假人以爾材
識敏明忠于奉上肆加茲寵以別汝能尚克祇承無忘
報稱

承信郎潘璋可閣門祇候制

朕于小大文武之臣苟材軼于衆者必思有以表異之
以爾智識敏明服勤匪懈茲予試爾以上閭之秩雖未
極褒陞而于汝輩流則寵矣可不懋哉

吳詡改合入官通判本州制

昔令尹子文毀家以紓楚國之難春秋貴之爾以小官
與聞郡政區區城守懼力不支願解已官募兵討賊訖
臻綏靖其志可嘉宜辭銓調之勞就佐一州之政勉圖
來效稱我茂恩

呂士昭提舉保甲兼河東提刑制

朕惟河東之民當敵騎之入一方凋瘵士氣索然思有以作新振起之以爾擢自稠人屢更繁使必能為吾得被堅執銳之士揚鉤深致遠之威雖列職外臺未殫所蘊政成來報朕不汝忘

劉亞夫何處厚復職與郡制

朕持刑賞之柄若權衡然稱物而為之重輕不以銖黍私也爾名在刑書有年數矣今而更始可以自新其還

爾之寵名以分吾之憂顧汝知夫復玷缺之艱難也可不慎哉

建陽知縣黃邦光起復制

晉人墨衰閔子腰經然一切從權有不得而廢者以爾字遐方之俗當羣盜之鋒扞禦征輸備殫忠力方為軍府之賴遽有家庭之憂宜奪爾情姑安厥職其體藉才之意無忘移孝之誠

大洪山僧守珍補承節郎制

頃者羣盜鼓行攻圍城邑汝營塢壁招輯鄉閭既衛善
良亦除凶慝其忠可錄何惜一官尚勉之哉毋忘後效
進納陳真可承節郎制

國家用兵有節者死有財者輸所以能濟也汝入金縣
官蓋知此意往登仕版無忝朕恩

信陽軍義士首領孫仲等補秉義郎制

爾等頃以從衆弄兵潢池聞朕招攜幡然聽命其膺銓
錄以待使令尚服予恩無渝所守

向子襄錢豐贈官制

朕惟敵人寇邊衣冠蒙難皆吾不足以勝殘而置汝于塗炭也故于追錄之際每加意焉以爾遭世艱虞共嬰城守力全節履遽沒其身爰錫閔章進官三等英魂如在尚克享之

王琪贈武經郎制

頃者姦民侵敗王略守險族拒犯吾顏行爾以偏裨出從主帥先登陷陣遽沒元身朕惟死者人之所甚難而

至于以生易死者非根于忠義疇克爾哉是用盡然進
官二等尚期精爽不昧欽承

曾升贈五官與一子恩澤制

朕閔夫死者以身從事而不得終于牖下也既崇以秩
又錄其孤嗚呼亦足以明朕意矣魂而不昧尚克欽承

浮溪集卷八

欽定四庫全書

浮溪集卷九

宋 汪藻 撰

外制

知江寧府宇文粹中落職宮祠安置制

朕惟國家于都會屯兵列戍又擇重臣臨之者非以屏
王室于平居閒暇之時亦惟朝廷或出于艱虞則四方
萬里之遠賴其大拊循之功以固吾圉具官某頃從近

弼出殿大藩所圖綏撫之良無負顧憂之託而威權素
奪巽懦無謀乃持柄以授人至委身而就繫吏戕民死
喋血江壖朕方窮致亂之繇用正爾弛防之罪而一方
冤狀猥自發舒其鑄秘殿之資往食真祠之祿無忘自
訟服我寬恩

知東平府盧益落職官觀制

朕惟國家有天下幾二百年所恃以安存者繫中外士
大夫相與維持之力一旦事出倉卒宗社阽危而四方

藩臣赴援者無幾朕甚傷之具官某初無他長早服顯
仕光被累朝之眷進登常伯之尊知人臣有見危致命
之忠在方面有振旅勤王之義而丁寧靡顧酣飲自如
逮予踐阼之初巧作謀身之計近臣如此謂疎者何其
鑄延閣之資往食真祠之祿茲為寬典無重後愆

翁彥國追奪寶文閣學士制

易曰開國承家小人勿用召康公于成王莅政之初亦
以求賢用吉士為戒蓋朝廷安危治亂之分在于用吉

士小人之間具官某本摘山之徒操駟僮之術諂事非類亟污從班以妾婦之道為身謀以豺狼之心幸時變比緣巡狩遣治別都言念艱虞之未平務從簡易而安衆屢加訓敕非不丁寧乃並法以為姦專阻威而害物毒流千里諸路騷然未明跋扈之誅已被幽間之戮不追寵秩孰慰羣冤雖既死之何知庶將來之可戒

范訥罷東京留守司降授承宣使淄州居住制

天下安注意相天下危注意將廼者朝廷蓋多故矣其

所以寵任汝者亦豈輕哉具官某擢自周行首膺器使
加以節旄之重付之管鑰之嚴所望夙宵分吾憂顧乃
令彈劾上達聽聞謂專懷顧望而無意勤王公縱剽攘
而不能戢士汝尚為爾予何賴焉宜還眷倚之權往即
省循之地過而能改朕不汝忘

李回秘書少監分司南京制

節義廉恥朕所望于士大夫也方國家艱危于此觀人
而以擇利誤朝形于言者之牘汝安取此哉具官某奉

事兩朝嘗參三府既不能知存亡而雪主之辱復不能
辨正偽而立人之朝處之恬然顏亦厚矣其正名于中
秘以分務于陪京服我保全無忘惕厲

馬忠落龍神衛指揮使降充經制副使制

朕于將帥待之至者所以責其忠望之深者所以必其
勝具官某粵從小校擢領中權寵任兼隆在廷莫比謂
能夙夜分朕顧憂乃無多算之奇莫止偏師之敗全軍
退舍坐失事機宜鐫衛帥之崇仍損使權之重再稽朕

命軍有常刑

惠柔民等押赴河北京東陝西路監當差遣制

人臣策名委質知忠于所事而已若夫死生禍福豈人
之所擇哉爾被選為郎分居臺省國家休戚何所不同
乃逆料時艱飄然去國自為謀則善矣獨不為朝廷毫
髮地乎被邊之州汝所忌者姑令而往當知夫忘身殉
國者未必不安而小智自私者不容于幸免也

趙點勒停制

孟子曰未有仁而遺其親者也未有義而後其君者也然則挾利懷姦不知尊上移所報于他人者其可使之在服哉爾受命典藩仕非不顯豈有國家之德不如權貴之恩駟駿名駒選充私廐駕駘下駟乃及乘輿悖戾之心一何至此斥從民伍示有朝廷汝雖至愚寧不知罪

開封府推官范世延降一官制

國爾忘家公爾忘私人臣所以事君也爾列官都畿分

守城壁方此多事豈容有他乃亂法以為姦專營私而
豐已徇羣小無厭之請希一時橫得之恩靡思體國之
忠徒挾耗財之意不加懲創孰警貪邪聊褫文階用明
邦憲尚圖來效以贖厥愆

向子諲落職與郡制

汝戚里子朝廷以六路之權付汝任不輕矣謂能夙宵
力圖報稱而肆為虛誕行不顧言私擁衆而多耗邦財
擅補官而不繇王命姑鑄寵秩畀以一州雖汝辯足以

欺衆亦豈能掩至公之論哉

張瑁散官安置權主管北外承司公事制

古之居官者官修其方一日失職則死及之爾職在河隄所當夙夜乃便安離局擇利自營坐使狂瀾奔流千里一城被害民悲為魚靖言昏墊之裁皆汝曠療之致宜申典憲以謝無辜聊黜置于散官俾責成于後效尚殫爾力以盖厥愆

周懿文散官嶺外安置制

昔季文子有言見無禮于君者猶鷹鷂之逐鳥雀也故
春秋不誅其人而誅其人之意豈無說哉爾服采在廷
官榮祿厚國家平日何負汝曹方君親危急之時雖釐
猶不恤其緯乃乘時幸變乾沒自私以為無復朝廷之
治矣嗚呼汝亦士也何為而至于此極哉念本無知誅
之奚益姑全首領投畀遐荒尚保餘生毋忘予德

前戶部侍郎邵溥降一官制

古者挈鉞之智守不假器出納靡吝何名有司屬者國

家多艱泉府政壞汝受寄委實為大農乃從官吏之營私不顧邦財之折閱公形判語案牘具存鞠實以聞宜從薄罰背公之罪毋廢省循

仲輯降三官制

朕觀漢唐宗室以沓貪暴戾失其爵祿而亡其軀者至不可勝數故擇同姓之賢者為汝曹率庶幾人人信厚如古盛時而近屬之間尚有仲輯朕甚傷之遇者王室多艱宗盟靡振朕于九族惟恐不咸而爾乃以口語紛

然為有司所劾豈朕所以待汝之意哉其示薄懲褫官三等尚思自好無陷非獎

胡舜陟胡唐老姚舜朋王侯各降兩官制

御史于百官之邪政事之闕皆得糾而言之朝廷所恃以為安也御史有不能其官者顧獨無責哉頃者代馬內侵變生都邑鑾輿出狩事孰大茲汝曾無一言為國長慮乃始終和議墮敵計中間而不懲失政刑矣褫官二等聊著厥辜尚服寬恩無貽後悔

王公亮降雨官放罷制

人臣守法所以事君率意妄陳罰安可逭具官某比緣
岳狩遣使殿廬方國艱危當思忠恪乃專為姑息欲利
小人無體國之公心懷市恩之私意不加懲艾孰塞僥
求聊錫寵進之階仍解誰何之職其祇予戒以省厥愆
淮東提刑汪師忠降雨官制

朕惟江淮之間羣盜充斥二千石不為用非部使者躬
行其封明于賞誅則民之寃安所赴愬爾幸蒙推擇職

在督姦知臣子奉公所當夙夜而棲遲偃仰于國藐然
食人之食而憂人之憂者固如是乎姑示薄懲鑄官二
等尚無後悔朕不汝容

方間降兩官銜替制

廼者盜發江壩一方喋血汝為使者受命督姦不折其
萌已為失職至變成禍結當力翦除乃退避以自營至
文移而亦廢逮臻綏靖事出他人方公肆于誕謾反自
論于功伐事君如此于汝安乎宜免所居仍鑄厥秩尚

為輕比無廢省循

太府卿徐公裕等降兩官制

孟子以左右望而罔市利者謂之賤丈夫故君子之觀人在于有所不取爾服官朝列惟祿是資謂能潔已以明汚顧乃乘時而射利市所臨之公賄法既不容利其直之私贏義將安據鑄官二等聊愧爾心取予之間毋忘慎擇

高衛落職降兩官官祠制

古者將帥死綏士大夫死列有離局失官者必殺無赦
茲師行有律而敵不能侵也具官某蒙國選掄分時憂
顧敵兵一入狼狽出奔縱力不支猶當守境乃委四封
之衆跳驅千里之餘茲而不懲何以為國雖值纂承之
慶難從赦宥之科褫爵秩之華資投官祠之散地祇承
寬典無重後愆

河北經制使馬忠降兩官制

師以氣為勝將以勇為能古者鑿凶門而出言有進死

而無退生也具官某受予推轂與敵交鋒既昧奪旂陷
陳之機復無以律行師之整三軍利用帥則不前千里
折衝朕將奚賴宜削褫崇之秩用明退撓之誅軍有常
刑汝無自佚

東南第三將郭實降兩官放罷制

國不知將之任將不知士之情兵家之大忌也爾居軍
吏之上當纖悉必聞乃賊徒交通近出麾下憤耗如此
軍容可知綏御之材非而所任鑄官二等仍解將權尚

服寬恩毋忘自訟

京西路轉運副使昌弼降兩官制

漢部使者以六條察郡國之不如法者所以治人而非治于人者也爾出分臺綱舉措專恣于繩治未有聞焉而反為人所劾豈不負吾任使之意哉鑄奪二官用懲失職毋以小罰為無傷而不戒也

知恩州趙子昉落職降三官制

分猷共理二千石之職也倘擇利自營馴致一城之禍

者烏可以不懲哉爾受命典州當趨期會乃虛其官守
引日不行坐使河隄決于所治提封之內民悉為魚靖
言昏墊之裁皆汝遷延之致鑄官三等仍解近班以謝
無辜猶為未減

翟汝文降兩官制

漢置部刺史秩六百石耳而吏二千石皆察焉所以尊
朝廷也具官某幸蒙國恩出典方面知奉使有指所當
遵承而妄引詔書猥相侵辱鑄官二等姑示薄懲尚鋤

而驕無重後悔

應天府鈐轄王徹降一官制

趨事赴功人臣之職也朕比除戎器用戒不虞輦致國
都汝司其役而屢加程督偷惰不虔既稽命以愆期方
便文而謁告考其用意安所逃刑宜鑄二等之階以示
有司之戒其思往咎服我寬恩

應天府士曹黃詡降一官制

樂事勸功人臣之職也食焉而怠其事可乎爾服采府

僚事官臺省知當趨期會而督責靡盬自干慢令之誅
宜正褫官之罰尚圖黜勉無重悔尤

南道總管司屬官仰齊降兩官勒停制

侵官亂法專命廢忠人臣之大戒也爾為人屬事有稟
承乃乘禍變以招權至用兵民而攝吏靖言狂率當伏
典刑姑示矜容削官二等往從民伍尚省厥愆

提舉皇城司郭鎮降兩官制

古者周廬千列以衛至尊宮正掌王宮之戒令此其職

也具官幸蒙推擇委以徼巡而桎梏之間誰何不謹宜懲怠慢井上兩官尚究乃心無貽後悔

內侍黃逖先降兩官取勘制

古者聽買賣以質劑雖防民私蓋朝廷之法也爾幸蒙官使曾不服馴悍驕而貪蔑視官府宜鐫爵秩以警無良其罪所歸則從吏治

知筠州楊允降三官制

古者四十而仕七十而引年所以節進趨厲廉恥也爾

智昏耄及貪祿忘歸不治之聲達于予聽鑄官三等聊愧爾心尚訟厥愆以休其老

知麟州韓忠嗣降兩官放罷制

扞城之寄所賴折衝失律而顛豈容佚罰爾檢身無狀專欲自私喪長吏之威權為下人之所逐鑄官二等非獨汝懲亦使邊臣視茲為戒

知建州張勲降三官制

朕以師帥之權付汝于數千里之外而馭軍撫民其悖

謬如此朕亦何所賴哉雖臯止鑄官務從闊略而無辜之民死者不可復生矣于汝安乎

知秀州趙叔近落職制

爾姦利之私有市井所不為者朕方置汝于理將肅清官曹延閣之班尚安得處其加鑄奪以聽有司

呂璽司勲各降一官制

廼者盜拏山東聲隱汶上汝承臺檄往備戎行乃假事以為辭至愆期而非顧褫官一等姑示薄懲軍有常刑

母貽後悔

徐慎言落職制

汝燕山之役附非類而得寵名者于有司之法當鑄久矣况以沓貪凶肆達于朕聽者乎官曹既清安用汝輩

浮溪集卷九

欽定四庫全書

浮溪集卷十

宋 汪藻 撰

外制

劉誨直顯謨閣知楚州制

人臣趨事莫樂于見知王者用材當求于已試以爾稟
資明銳臨事激昂昨將使指之光華備歷征塗之險阻
茲分憂于凋郡宜進秩于清班尚體仰成佇聞書最

李會徽猷閣待制知廬州制

朕比緣岳狩申警邊虞厥惟衝要之藩當得老成之雋
具官某早因時望進陟英躔常持平進之心殊有後凋
之操中投散地頗鬱輿情茲升延閣之班特付專城之
寄尚思綏馭無負眷懷

劉寧止直龍圖閣同提領水軍制

朕修方岳之巡講舟師之備欲恢遠略當得通材以爾
稟性端方臨機敏銳衮衮盡納言之益惓惓懷憂國之

心是用假延閣之班付昆池之事勿辭勞劇同濟艱難

孟汝嘉馬向刑部郎官制

既得之情仁人不喜一成之法君子盡心朕于庶獄雖罔敢知而擇人之間未嘗不慎以爾等吏能屢試風力有聞平反之長人頗推汝往膺省戶之選助閱邦刑之書廣朕好生欽哉毋忽

俞隨劉公彥知東上閣門事制

朕肇開四門延納多士思得戎班之俊長吾賓贊之寮

具官某秉德忠純受材開敏地處橫班之邃秩升廉使之崇其服端揆並司謁者肅等威于表著之位傳臚句于陛廉之間嗣有寵褒無忘祇恪

劉錫可龍神衛四廂都指揮使制

朕以中國之大而制四邊以九重之尊而臨天下宜有統督用彊主威具官某躬沈鷺之資任爪牙之責早登勇爵聲望著于三軍旋總戎昭精神行于萬里肆加異數進董親兵爾其分夙夜之憂俾朕獲寢興之佚忠勤

無斃恩賞何涯

馬忠可龍神衛四廂都指揮使充河北路經制使
措置節制軍民兵等事制

朕惟兩河之民更百戰之役田野三時之務所至一空
祖宗七世之遺厥存無幾肆風宵之軫念如冰炭之交
懷孰知拊循經遠之謀我有臬俊折衝之士具官某幾
能先物勇不顧身胄出名家得山西氣俗之厚任更邊
鎖知漠北封圻之詳昨逢多壘之艱屢立扞城之績雖

進厥秩未殫所長爰升統帥之崇加畀使權之重料百
城之丁壯總以五符提兩路之精強蒐其軍實兼收羣
力用展壯猷上以迎二聖之還下以正四方之守任我
之責時乃之休

辛企宗提舉御營使司一行事務制

出而戡敵專師律之雄居則衛王總禁屯之重我有虎
臣之貴兼諸人傑之長借爾威稜振吾綱領具官某性
資敏甚氣節偉然持重不驚得真將軍之勇好賢如渴

有古名將之風茲喜還朝方資扈蹕爰付劇煩之寄用
觀周濟之才勿以賢勞孤予器使

從仕郎傅雱改宣教郎借工部侍郎充大金通和
使制

朕講殊鄰之好求專對之才念國家艱難之餘乃賢者
馳騫之日以爾疏通無壅沈鷺有謀雖山濤不學于孫
吳而季布得聲于梁楚比選出疆之使實膺仗節之行
方事遐征無幾微見于言面宜加寵數進禮樂而有光

華是用擢之銓調之中假以事官之貳庶爾一言之合
成吾兩國之歡日佇來歸毋忘自力

大金通和使傳雲轉五官郎官制

朕昨聘殊鄰首馳信使如文王有玁狁之難始于憂勤
乃博望至月氏而還得其要領宜加寵賚式獎賢勞爾
奮自書生蔚為國士挺身應募遂膺仗節之華即日辦
嚴靡憚乘輅之遠果持書幣邁返闕庭是用峻陞朝著
之班仍正省闡之選示朕見知之意旌而不辱之功尚

體眷懷毋忘忠藎

修職郎王倫改朝奉郎充大金通問使制

朕惟疆事未寧親庭在遠夙宵軫念庶孝悌通于神明
物色求人儻忠信行于蠻貊眷茲久矣今乃得之以爾
冑出公侯資兼勇智言念主憂而臣辱何有于生如皆
已佚而人勞孰當其責雖淹回之未試獨慷慨以請行
宜升郎秩之榮仍委使華之重朕既俯同晉國用魏絳
以和戎爾其遠慕侯生御太公而歸漢勿憚徂征之遠

佇期歸報之休

知杭州葉夢得復舊職制

股肱宣力四方實寄藩維之重精神折衝千里允資師
帥之良矧吾左右之臣殿彼東南之服雋功來上褒渥
可忘具官某蚤以時才揚于禁路粹矣朝廷之表巍然
人物之英治必有聲能使所居之官大動皆中節故每
不勞而功成比緣獬廌之潛未正鯨鯢之戮篁竹深阻
谿山繹騷廼攄掌上之奇盡服潢中之衆惟三仕三已

莫明令尹之心故七縱七擒微見武侯之略宜還寵數
用示眷懷尚加厲于壯猷庶永綏于遐俗

姚平仲復吉州團練使所在出榜召赴行在制

漢室備邊復魏尚雲中之守秦人禦晉赦孟明殽毘之
奔與其選衆而收新進之材曷若棄瑕而責老成之效
具官某稟資沈鷙事上樸忠昨緣外侮之侵嘗畀中權
之任乃恃戎昭之果靡遵廟勝之謀坐此逾年隱于亡
命肆朕纂圖之始時求敵愾之良議者皆言汝為可用

執干戈而衛社稷方急壯猷聽鼓聲而思將臣宜頒異
數爰復州團之秩俾趨獄狩之朝庶分北顧之憂尚救
東隅之失勉圖爾績仰副朕知

權邦彥復舊職知江州兼制置使制

遇敵而致黽陵之奔孟明有罪毀家而紓楚國之難令
尹為忠我有藩臣嘗隳城守已正簡書之坐當還符竹
之分具官某頃典大州適當強敵既盡逾年之抗遂遭
全室之留雖徐庶思親何勝方寸之亂而真卿委郡不

廢朝廷之歸在國法以靡容于人情而可憫付兵民之重寄專江漢之上游盡復爾班式遄其往毋愴家庭之禍當思王室之艱

陸藻李邴復舊職制

朕選儲人材如圃藝木封殖長養各成其天與其擢自條枚待堅實風霜之後孰若因其合抱創殘斤斧之餘具官某蚤以時髦儀于禁路文章爾雅有作者之風議論正平得近臣之體一從吏議再閱歲時既霈澤之

更新宜故官之稍復人惟求舊朕方深賈傅之思忠不
忘君汝無廢蕭生之意其加恬養以待簡求

李庠復官星夜發來赴行在制

朕捐金爵以致天下之士聽鼓鼙而思將帥之臣豈伊
一青之微廢此三軍之望具官某受材英特秉性忠純
蚤登勇爵之崇嘗總親軍之重中緣坐法亦既更時宜
盡復于故官俾亟趨于行闕佇膺煩委用展壯猷

給事中王綯復朝散郎制

聖人之心如權衡之公法無私者君子之過如日月之
食人皆見之具官某項服禁嚴職當獻納而失于詳慎
至陷小文茲被湛恩宜除宿負衛侯醇謹初豈有于他
腸顏子庶幾尚何憂于貳過毋懲纖芥而廢激昂

孫默許德之復官制

有司之法如權衡雖微不失人主之恩如江漢何濯非
新朕入纂丕圖與民更始矧吾士類尤所當先爾嘗以
過差絀于吏議茲予拔拭不汝瑕疵宜盡削于丹書復

進參于華貫幸難數得其戒之哉

新除中書舍人孫覲可待制與郡制

任賢者雖人主之明從欲者亦聖人之恕茲用時髦之
俊復居詞禁之華遽以疾聞難以詔奪具官某早膺掄
擢寢服禁嚴文章為後學之宗論議得近臣之體中緣
排斥久已照知方賈諠見思欲召還于宣室而仲舒厭
事頗不樂于京師宜升延閣之班再付專城之寄其攬
所蘊以拯吾民佇觀千里之休入奉三年之計

孫覲知平江府制

朕惟儒雅飾吏事皆西漢之能臣岳牧用詞人蓋有唐
之舊制眷吳門之重鎮邇岳狩之行朝戶口夥于承平
之餘人心搖于驚擾之後不付賢雋孰分顧憂具官某
明國憲章知民情偽學必期于有用材無適而不宜茲
詔來歸力求自便以甘泉之法從臨通德之鄰封子牟
雖在江湖豈忘魏闕汲黯宜居禁闥毋薄淮陽勉布中
和即還巖近

胡舜陟徽猷閣待制淮西制置使制

策名委質可萌苟且之心趨事赴功尤在艱難之際矧予馭貴惟以勸忠既聞敏銳之才何愛褒揚之渥具官某邃通經術明識事機頃在朝廷衮衮盡致君之益洎居方面惓惓懷憂國之忠比閱奏陳備知祈向願禔躬于卒乘以同獎于朝廷是用升甘泉法從之班付淮右陳屯之事用昭殊遇佇展壯猷尚觀儒者之折衝勿使武夫之專美

鎮慶關使徐傑轉防禦使制

朕披荊棘以立朝廷聽鼓鼙而思將帥苟當懋賞豈負
成言以爾頃被選掄出分憂顧坐控邊關之阻靡容敵
騎之侵戍既更時寵宜如約爰進扞防之秩用為屯守
之光益務綏懷仰求嘉獎

閻瑾正任防禦使制

謙者君子之光異者武人之正故先鳴而求勇爵見鄙
春秋獨屏而恥論功取高漢史具官某比提義旅來援

京師屬余踐阼之初錫爾賞勞之典抗章不拜陳義甚高宜加褒勸之恩用正扞防之秩尚思策勵無負眷知

通問副使武功大夫趙哲可達州刺史制

朕通兩國之和遣單車之使求專對四方之士既得忠良顧出疆萬里之行可無褒擢具官某受材膚敏臨事激昂久膺在服之榮茲預聘鄰之選將誠甚遠具有皇皇之華受命靡辭初無惴惴之色是用特頒殊渥升刺大州以昭臨遣之榮以勵願行之志其思報稱副我仰

成

武義大夫董植可落致仕制

爾忠勇之氣投老不衰方邊防急甚于救焚豈壯士得從于高枕起之間佚以示見知其擴恬養之豪用稱搜揚之寵

辛炳落致仕制

朕惟靜而問世者可與語天下之謀恬于趨時者可與共朝廷之任爾十年不調歸老于家雖屏迹無意于入

間而飛聲日聞于朕聽宜輟安車之樂復參文石之班
出處惟時毋專求志

蘇軾孫從事郎符改宣教郎制

論世者豈惟喬木懷人者猶及甘棠偉哉千載之英繫
我五朝之望朕不及見有孫而才宜加改秩之榮用示
好賢之意昔賈生明王道漢錄賈嘉之能魏公進忠規
唐表魏謩之烈人門兼用今古所同其振爾之家聲以
待予之器使

入內侍省武經郎朱回敦武郎陳彥乞轉出歸
部致仕依所乞制

爾等宣勞宮省洊歷歲時茲緣疾恙之侵不勝洒掃之
職願還銓部歸老田廬朕常恐一物之遺其遂爾終身
之志尚加調攝以稱懋恩

譚世勳贈延康殿學士制

松柏有心于歲寒而乃見璠璣至寶豈烈火之能遷朕
遭滄海之橫流陰考士夫所趨向責其大節全者幾人

方嘉一士之聞已歎九泉之隔清規如在褻典可忘具
官某學貫羣書文馳六藝純誠自表坐銷世俗之浮廉
靖無求獨得古人之大蚤預持麾之選徧更法從之華
二聖所知羣臣鮮及肆履艱危之會果專忠孝之稱雖
甄濟佯瘖靡汙天寶之亂而龔生遽天不見南陽之興
爰錫命書升華秘殿以聳具臣之聽以為信史之光冀
爾英魂歆吾至意

知懷州霍安國贈延康殿學士制

賢者事君豈為保妻子之計國家多事所貴死封疆之
臣我有藩宣之英靡從威武之奪既遭奇禍宜峻恩章
具官某少有令名屢更煩使昨任州符之寄適當邊徼
之衝嬰無援之孤城抗方虢之強敵壯矣張巡之百戰
躬履顏行哀哉卞壺之一門幾無噍類屬予初載聞此
沈寃念逝者之何辜為潛然而出涕茲升華于秘殿仍
加恤于遺孤庶爾精忠光吾信史

中書舍人葉壽贈徽猷閣待制制

人君予奪何有于胷中天下是非嘗公于身後眷前朝
之近侍惟鉤黨之非辜既削深文宜還故秩具官某性
資和裕心術剛明讜論排姦不屈浩然之氣高文行遠
還追作者之風中遭媒孽之仇久拚焦蒿之恨茲分枉
直奚間幽明煥延閣之新班易重泉之往槩英魂如在
茂渥其承

劉韜贈特進制

忠人臣之大本全者幾希死天下之至難在乎所處嗟

我仰成之耆哲挺然不屈于兵威既沒元身宜加爵秩
具官某天資莊重心術邃明內領藩條懋活民之政外
臨邊鎖揚威敵之功方資廊廟之謀遽履朝廷之變不
幸聞名于強敵將令毀節于邊廷龔勝飾巾心肯移于
二姓仲鍼臨穴人將贖于百身升華一品之班加賁九
原之祿庶幾精爽不昧欽承

鄭穀贈七官制

為官擇人方資帷幄之勝盡瘁事國乃致股肱之虧孰

攄震悼之懷惟有褒崇之典肆頒異數用表遺忠具官
某莊重而有威剛明而知斷至誠憂國皇皇無一日之
安正已立朝凜凜有萬夫之望雖歲時之未久賴籌策
以居多天不憖遺邦其殄瘁峻陟文階之等用為幽窆
之光復魄儻存垂休無斁

范浩贈直徽猷閣制

自古皆有死誰則長存為善而獲殃謂之不幸肆頒異
數追弔沈寃以爾某早有軼材嘗登臚仕初謂洛陽之

年少可與有為孰云北地之儒生遽罹非命由吾至此
為爾愴然宜升密勿之班進預凝嚴之直尚歆宸渥勿
悼泉局

孫鑿李熙靖王資深韓持各贈五官制

人臣盡瘁既罹易簣之凶王者飾終宜懋書棺之渥矧
居近侍可廢常規具官某學問淹該操修堅正早預時
髦之選寢參法從之華奄忽云亡愍傷何及不陟文階
之峻孰明卹典之哀是用追錫殊恩躡升數等其服詔

除之寵以為身後之光

右武大夫梁州防禦使知滑州張撝贈三官四資

恩澤制

朕稽盟府而懋賞功之典聽磬聲而思死事之臣以爾
具官某料敵有謀秉心無貳昨守瀕河之壘適當喋血
之鋒身奮于前力窮而踣既峻陞于顯秩仍悉祿于遺
孤英魂未亡幽局奚憾

浮溪集卷十

欽定四庫全書

集部

浮溪集卷十一至
四

詳校官庶吉士臣翁樹培

侍讀臣孫球覆勘

總校官檢討臣何思鈞

校對官編修臣朱攸

謄錄監生臣于復慙

欽定四庫全書

浮溪集卷十一

宋 汪藻 撰

內制

韓世忠起復檢校少師武成感德軍節度使制

朕遭百六艱危之後賴二三梟俊之臣跪推轂而遣將
軍守境既騰于戎捷歌出車而勞還帥酬勲敢廢于邦
彝爰錫贊書用孚羣聽具官某勇聞天下氣蓋關中堂

堂將種之英凜凜軍鋒之冠行已恭而事上敬蚤服周
行臨機果而料敵明屢揚偉績昨屬交侵之警俾屯要
害之區蓄銳以須鼓僥而擊縱精兵于數路若珠走盤
擠勁敵于長江如杵投臼坐以中堅之整成茲南紀之
安威行而海內息肩師勝而國人屬目是用魚隆徽數
特奏膚公出擁齊旄易兩鎮提封之大入乘夏篆視三
孤絕等之崇申衍采封陪敦井賦以永旂常之載以昭
惟幄之成於戲武能威敵者將帥之榮賞不踰時者人

君之信惟忠力可以任安危之重惟謙沖可以保富貴之終勉圖而休毋廢朕命

韓世忠除兩鎮節度使制

提貔虎以振天威采入山川之阻取鯨鯢而攄國憤永為宗社之休既執訊以來歸宜酬勲于不次肆頒明命敷告治朝具官某事上樸忠臨機英果稟剛故俗甘陳蕪六郡之良決勝重圍飛羽有萬人之敵蚤備師干之試旋膺齋鉞之除豈惟蹇蹇以匪躬每見多多而益善

昨屬時巡之遽因成國步之艱羣小窺朝元兇干紀既
罪人之未得斯王旅以徂征迎敵鼓行靡待前茅之偵
擒囚歸報遂成獨柳之誅華夏由此以知威天地為之
而卷褻凱歌一奏盟府交書是用取累朝最盛之規加
兩鎮久虛之幄視班亞保升爵元侯增邑食于爰田衍
井腴于真賦併為異數用表元勲於戲見無禮于君爾
既殫于忠盡歸飲至于廟我何愛于寵褒惟功名烈士
之始終惟爵祿有邦之勸沮尚圖後效更揜前休

檢校少師武成感德軍節度使充神武左軍都統
制韓世忠加恩制

朕躬帝親之饗合丘澤之祠一紀二精幸拜熙成之貺
千乘萬騎孰宣拱扈之勞我有勁臣宜膺徽數具官某
忠不避難勇常冠軍先人有奪人之心進則奮沈雄之
略尚賢無自賢之行退而皆名義之談兼兩鎮之節旄
視三孤之皮帛軍律整甚玉靈赫然遠斥堠而省文書
士皆為之樂死倣師徒而討亂略疆由是以少安比修

重屋之儀尤謹周廬之衛祝嘏所告君臣則同乃增井
邑之封仍衍賦租之入爰示旌忠之義以均受胙之休
於戲心膂爪牙方資籌策之勝橐𢈵戟纛益聳威儀之
瞻惟滿盈天道之所虧惟正直神明之所聽服我休命
欽哉惟時

張俊檢校少保寧武昭慶軍節度使制

三軍利用莫如忠勇之兩全十乘啟行尤貴武文之兼
寵朕博稽輿論優獎虎臣乃疏進律之褒用竦在廷之

聽具官某性資沈鷺材力驍雄得孫吳方略之奇兼信
布爪牙之勇執干戈而衛社稷居存蹇蹇之忠安邊境
而立功名躬履堂堂之陣昨緣多故尤見殫誠提萬旅
以趨朝扈六飛而復辟旋因冬狩留駐海壖偶邊馬之
長驅帥王師而鏖戰奮當大敵援枹鼓以忘身坐掃邊
氛用鯨鯢而築觀茲及行朝之底定復銷羣盜之搶攘
併錄茂勲用加酬賞秩視三孤之貴地兼兩鎮之崇載
錫爰田仍加真賦增中權節制之重示上將威儀之多

於戲有功見知朕既每存于大信縱敵生患汝其勿替
于前功惟一心同獎于朝廷斯千載永書于令甲服予
之訓時乃之休

檢校少保定江昭慶軍節度使江淮路招討使張
俊加恩制

朕遙修吉禮歌昊天成命之詩翕受靈釐拜黃帝泰元
之策孚號四海疏恩百工有懷隆委之臣方屬凱旋之
役其因祚祉以獎賢勞具官某材雄萬夫身履百戰統

騎士材官之衆屢奮天誅執信臣精卒之權蚤膺邦寄
綰節旄之兩組視皮帛于三孤昨奉王靈出征江介冒
敵而進忠如皎日之明當鋒者摧勢甚迅雷之擊曾未
朞月卒成大功靡淹貔虎之師坐獲金湯之固惟邊虞
之綏靖致禋祀之備成不懋寵休孰明忠力乃進封于
多戶仍申錫于真租於戲聖勳也威莫大安民之武祭
澤之大宜均惠下之仁惟忠義天下之大閑惟謙亨君
子之終吉益勵爾績用成厥休

皇叔檢校少保光山軍節度使知大宗正事士儂

加恩制

朕膺祖宗之傳序蒙天地之貺臨見泰元之尊幸潛交
于肸鬯眷宗室之老宜首霈于龍光錫以命書頒于朝
著具官某疏達通敏忱恂靖莊更險夷而秉忠孝之心
居富貴而絕侈驕之習出神明之後雖益疏而不王閔
義理之多知為善之最樂昨付齋壇之鉞仍垂夏篆之
車祗扈時巡克惇屬籍茲成複廟之饗益見維城之功

是用增廣舊封併加真賦於戲服膺分兄弟之國蓋莫
重于天支帶礪指山河之盟其永蕃于王室往服休命
無忘遠圖

士儻特起復依前檢校少保光山軍節度使制

朝廷之尊爵常兼德閭外之治義則揜恩我有宗英久
司屬籍既銜哀而去位盍變禮以從宜誕告治朝式揚
新命具官某禋身敕備操行淑均出祖宗胄裔之華得
師友見聞之博漢廷大議更生世列于公卿唐室中興

道古官兼于將帥蚤被展親之渥獨專糾族之權雖支
疏旁及于葭莩乃信厚皆如于麟趾方茲寵寄遽以憂
聞用大宗率小宗當念維城之重以家事辭王事豈悖
許國之誠況在從戎固難終制其復齊旄之拜以隆公
族之瞻於戲孺慕終身喪雖無于二事宗盟同姓禮蓋
許于奪情姑輟蓼莪之哀母令常華之廢勉興塊次茂
對邦休

皇叔祖檢校少傅靖海軍節度使開府儀同三司

嗣漢王仲湜加恩制

朕涓吉杪秋乘上辛之正氣肇禋重屋修邃古之闋儀
會天地祖宗之神奉粢牲圭幣之薦惟時公族實相躬
祠乃均錫于靈釐用光華于屬籍具官某清修寡欲肅
括禋身于親莫尊為劉氏之祭酒其德可尚分魯公之
大旂以宗盟之統而視近弼之班以王土之封而龔洪
支之慶聞合宮之祉祝承明詔以駿奔當柴燎之升禋
奉匏尊而參酌曲盡始終之恪實宣左右之勞綏我思

成莫如同姓爰侈井封之舊仍陪圭食之真於戲將相
寄以安危敢重煩于耆艾親愛欲其富貴始務極于尊
榮勉遵令猷永介多福

戶部侍郎呂頤浩戶部尚書制

舜列庶位莫非因能漢多真材蓋以久吏故大而如夷
夔之賢者終身禮樂小而如倉庫之賤者至氏子孫與
其用新進之士而試以劇煩孰若遂已成之功而峻其
班秩具官某早用儒奮晚為吏師智略縱橫得古人心

計之妙規摹詳密知天下利源之餘茲卜時巡實資邦
用總為經費責在有司所貴通融之權豈惟出納之吝
疇習予事莫如汝能是用就升常伯之聯全付大農之
政惟生衆用寡而無悖出之弊則貫朽粟陳而及承平
之時朕既紓憂汝為稱職

少保尚書左僕射呂頤浩加恩制

朕承列聖之基荷三靈之眷當艱危屯否之運賴擁佑
全安之休念德之大者非美報無以昭其誠曰禮之隆

者惟躬祠可以達其義乃涓剛日祇見合宮眷吾同德
之臣實首侍祠之列爰頒渙號用告明廷具官某偉識
自天英才經世以忠勞安社稷屹如山嶽之崇以彊敏
決事幾沛若江河之下有大勲于彝鼎無異論于搢紳
昨辭廊廟之尊出殿藩維之重中權不試南紀以安歌
破斧而美周公雖嘗分于內外開延英而見裴度茲復
寄于安危方鋒車祗覲之辰適玉食齋居之次元老顯
相羣工駿奔爰增井食之封益峻鈞衡之望於戲正直

為神之所聽固雅志之素孚福祥非朕之敢專宜均恩之首及往弼邦治其承天休

起復鎮潼軍節度使開府儀同三司充醴泉觀使
孟忠厚加恩制

朕展窠合宮薦誠上帝從昆侖而入既成綿蕝之儀奉
繭粟以祠幸獲煥黃之應有嘉異姓之戚適列侍祠之
侯爰錫詔恩用孚朝聽具官某敏而好學忠以事君同
國之憂無忌獨兼于文武為時之傑野王宜任于公卿

早登旄鉞之班繼錫袞衣之命戚藩增重朝著益隆茲躬拜于熙成實有資于顯相乃均慶賜首及親賢進荒大邑之封仍衍真租之入於戲朝廷八柄莫先貴富之頒祭典十倫尤重親疏之別兼將相威儀之盛預天人精禋之交茲為爾榮無替朕命

孟忠厚特授起復鎮潼軍節度使開府儀同三司充醴泉觀使進封東海郡開國侯加食邑食實封制

朕膺南面之尊賴東朝之訓禍移中壺既臨窆祔之期
恩及外家宜厚朞功之屬肆頒徽數敷告路朝持服前
寧遠軍節度使充醴泉觀使東海縣開國子食邑五百
戶食實封二百戶孟忠厚蚤負通材亟躋膺仕忠于事
上膺兩宮奉使之榮學以忘憂為四姓小侯之冠自正
齋壇之拜尤高戚畹之稱中罹閔凶久輟朝請念徽音
之益遠知厚德之難酬乃錄遺宗徧加殊渥求于母黨
孰恩服之並隆惟我人英蓋親賢之莫二是用奪哀麻

之制還旄鉞之權相吉壤以開藩載嚴戎律視上公而進秩永穆師瞻既疏侯社之封仍賦祠庭之祿益陪圭食加畀井腴以慰在天之靈以伸濡露之感於戲薄氏長者實有助于漢朝吳侯小心亦中興于唐室惟謙恭可以長世惟忠蓋可以亢宗服予邦休篤爾私慶可特授起復鎮潼軍節度使開府儀同三司充醴泉觀使進封東海郡開國侯加食邑五百戶食實封二百戶主者施行

寧武軍節度使開府儀同三司充兩浙西路安撫
大使劉光世加恩制

朕即九筵之室躬三歲之祠誠意上通靡待薦辭之史
蕃釐下逮均沾相祀之臣乃眷周行疇膺重寄爰頒祭
澤之渥用獎戎昭之英其官某志銳而堅謀深以遠久
矣將屯于近甸隱然為國之長城日月旂常蓋屢書于
成績江淮草木亦咸識于威名比嚴禋祀之修雖阻駿
奔之助邊防不聳吉禮用成繄陪扈之實勞豈褒揚之

可後肆加多邑并衍真租益增袞鉞之華永著山河之
信於戲天下安危之所繫方賴折衝聖人齋戰之兼修
敢專受福既拜神明之貺當圖宗社之安服我榮懷保
茲譽處

檢校少保建武軍節度使龍神衛四廂都指揮使
楊惟忠加恩制

朕稽汾上之圖以靈承天地歌我將之頌以升配祖宗
祇被崇筵居總章之右个薦修備物因平秩之西成既

畢宗祈當明福應乃眷爪牙之舊方揚江漢之威錫以殊休告于列位具官某生而氣決少以材聞勇不顧身本山西之將種謀常先物得圯上之兵書秉油幕之中權為羽林之上將執羈縻而扈時巡之役率貔貅而行內宄之誅茲竣事于合宮肆均釐于寰宇矧居統督可廢彝章衍井邑之新封增賦租之久食用均錫羨以獎勤勞於戲饗神而獲精禋之交福祥斯下命將而任顧憂之寄慶賜是宜往懋厥休毋煩予訓

資政殿學士李昉滕康權知三省樞密院事扈從
大母往洪州制

朕眷留近甸規復中原載惟南國之奧區宜處東朝之
嚴衛乃令近弼恭扈遐征既專留鑰之權仍總行臺之
政具官某剛明而沈邃敦實而裕和謀謨為至治之基
議論得大臣之體延登未久已聞魏相之有聲委任雖
艱所賴姚崇之知變茲屬阽危之會尤須倚重之才孰
副予求莫如汝器是用輟從四近之列遣率百司之行

朝長樂之宮以日承于溫清分周公之陝其身任于安
危稍戢干戈即還廊廟

東京留守杜充同知樞密院制

精神折千里之衝莫若先聲之振文武作萬邦之憲允
資全德之良朕憂未濟之難思得非常之佐永懷人傑
久去朝廷輟諸管鑰之嚴付以樞機之重具官某剛明
不撓沈鷺有謀徇國忘家得烈丈夫之勇臨機料敵有
古名將之風比守兩京備更百戰華夏聞名而褫氣兵

民趨死而一心與其統方面而保我國都孰若委腹心而還之廊廟庶仲尼既用齊人悉反侵疆隨會來歸晉國永無羣盜副予虛佇時乃之休

待制楊時工部侍郎制

朕不堪多難思見老成如升堂而聞簫韶庶幾還風俗之厚若入國而望喬木有以知朝廷之尊既得其人當縻以秩具官某言垂當世名配前修學必可行得師友淵源之正心無他慮惟國家飢渴之憂茲復綴于清班

將每詢于黃髮雖閔勞以職事之劇然重失此典刑之
英非貳卿崇獎何以慰士大夫之心非起部優閒無以
寬耆艾之責勉留助朕勿復言歸

御史中丞張守禮部侍郎制

昔光武受命漢儀復見于中原平王遷都周禮但存于
宗國繫品章之傳世繇官守之得人自時艱難禮樂湮
放朝廷容典百不一存孰知綴緝補苴之宜賴有詳練
疏通之士具官某材兼世用學到古人文章行遠而日

新議論處中而時當自予識擢多所建明顧久陟憲臺
勞柱後抨彈之事宜擢居宗伯付淹中綿蕝之文勿以
司存而忘忠告

待制陳彥文兵部侍郎制

宣力者股肱之臣而論思歸于法從將屯者將帥之職
而政事本于文昌朕因方岳之時巡周覽江湖之形勝
既用老成之略宜還亞旅之班具官某稟氣清剛臨機
敏銳早膺委寄賴文武之兼資中坐譴訶挺險夷之一

節比任偃藩之劇屢聞敵愾之奇雖外資蒐練之長懼
中失贊襄之益往貳中臺之秩實專武部之權尚展壯
猷對揚休命

吏部侍郎劉珏吏部尚書制

國家待士以三銓之嚴積功于百年之久雖重輕委法
固不足以收一世英豪然能否隨人亦未嘗聞終身留
滯自時南狩滋紊典常非夫藉老成通濟之才何以勝
頽靡劇煩之任具官某性資夷澹心術剛明所守不回

有古人之風烈其言可復為世論之統盟自臺閣之偏
更每功名之可紀粵司官簿再閱歲時豈惟嘉裴馬之
知人固已及唐虞之考績是用擢居其長益究爾能激
濁揚清據天下人材之會論思獻納首甘泉法從之班
伊我俊髦奚煩多訓

刑部尚書周武仲吏部尚書制

朝廷有端方之人則鑒裁公而流品肅官府得詳練之
長則紀綱立而事功成矧吾銓曹實冠法從任激濁揚

清之責當扶衰振弊之時不求時髦孰厭公論具官某
宗廟瑚璉之器國家羽儀之賢材本天成渾然不見圭
角德雖日用考之皆有宮庭蚤揚臺省之聯久積士夫
之望逮予初載首副詳延歲寒而松柏後彫昔聞所守
鑑明而塵垢不至今見其心爰陟天官之尊仍陪經幄
之邃置諸人物銓量之地觀汝廟堂經濟之材方藉遠
猷奚煩多訓

御史中丞王賓刑部尚書制

孔氏之門子路折獄帝堯之世臯陶惟刑盖非剛而勇者不足以持法之重輕非直而清者不足以寄人之生死具官某心秉端慤學道精深正色立朝常自下而劄上捐身闢策不苟剛而吐柔粵從朕于艱難即照知其忠實一登諫省之邃兩總臺綱之嚴金鑄鼎而魑魅莫逢姦邪既遠獸在山而藜藿不採威令自行是用升之常伯之尊付以祥刑之重爾其決讞以抨彈之果平反以獻替之忠庶幾無訟之功成坐使所居之官大

給事中周望兵部尚書制

朝廷分職政源悉本于文昌天下多艱邊算方資于武
部矧在邇聯之選尤高常伯之除茲得俊髦亶符公論
具官某高明而多學沈鷙而有謀才為時生少則有拯
民之意智因機顯動而成希世之功昨將使指之光華
每得敵人之要領比緣國惡未正邦刑獨冒險以直前
卒成禽而歸報是用付以腹心之寄升之喉舌之司公
綽書生能奪武夫之氣陳遵儒俠坐成反寇之誅往展

壯猷嗣頌優數

兵部尚書周望同簽書樞密院制

腹心留侯高祖肇基于有漢文武吉甫宣王復振于宗
周非夫躬不世之全材何以濟中興之遠業賢者登用
國其庶幾具官某志大而器宏謀深而識遠治術講明
于習次學不空言事機迎解于目前神無滯用肆朕難
難之際得于危從之間夷險百為始終一節有功見知
則悅屢膺使指之褒執事順成為臧仍有戎胎之捷是

用參稽輿論進陟機廷威重一臨姦萌皆弭所賴廟堂
之上相我維持豈徒帷幄之中為之指縱勉思康濟用
副眷懷

呂好問除尚書右丞制

富貴不足解憂方極慕親之念孝弟施于有政莫先同
德之求朕以眇躬嗣承大統遭家不造凜若淵冰雖三
軍舉同左袒之心而二聖未返北轅之役常棣之華韡
韡敢忘原隰之求大隧之樂融融有待封人之薦具官

某儒術之茂闇然實章信厚之資老而彌篤徧陪甘泉
法從之列實自靖康總攬之初從容片言綽有回天之
力險夷一致益堅衛上之忠肆圖邦命之新進總文昌
之轄倚老成于典刑之重登世臣于故國之遺朕之股
肱誼同休戚其念兩宮戴天之義體予一人側席之思
倘能遣侯公而說之必有御趙王而歸者竝惟乃辟是
佑則于永世有辭

秦檜特授通議大夫守尚書左僕射同中書門下

平章事進封文安郡開國侯加食邑食實封制

君臣相須成體股肱良而元首乃尊政事要在得人綱紀張而衆條皆舉朕遴選賢佐協圖治功孰膺名世之期我得與邦之俊肆頒大號用詔羣工具官某才博而周氣剛以大出處行藏皆合乎道死生禍福不移其心謀國盡忠嘗若著龜之先見捐身挺節獨如松柏之後彫巍巍真社稷之臣奕奕蓋廟堂之器昨緣入望參決政機惟獻替之日陳殆弼諧之天授定策而安劉氏素

聞周勃之賢矢謨而翊舜朝終賴臯陶之智是用擢登
次輔實首中台廣井邑之提封增賦租之奠食肇開侯
社并峻文階以明論相之公以輯用賢之慶於戲君不
借才于異代所資當世之豪英天將降任于是人必付
終身之勲業朕既兼收于羣策汝其勿棄于分陰往恢
厥圖卒相予治

紫此制凡選宋人四六者多錄之而標
題缺書秦檜二字惟永樂大典所載不

缺今仍其舊與下卷李綱落職鄂州居住
篇對看並足徵當日遣詞之工而非實

浮溪集卷十一

忘所天是用夙夜靡遑力圖報稱而羣情雖切偉範未
昭幸今方內底寧歲豐兵卻車書文軌指日可同豈寡
昧克堪寶慈訓所致宜稽典禮仰正鴻名臣不勝大願
謹奉玉寶上尊號曰教主道君太上皇帝伏惟太上皇
帝陛下與神為友游物之初遵汾水而憇華胥訪廣成
而追大隗玩其清淨福我邦家億萬斯年為衆君父臣
誠欣誠躍稽首頓首謹言

皇太后告天下手書